

政

問

錄

政問錄叙

竊嘗觀察兩間無一處不生萬物林林總總各具法象各正性命亘古亘今未嘗間息嗚呼於此其見天地之心乎惟仁者全盡此理故其心常以天地萬物爲一體夫既以爲一體則視一物失所何啻惻隱之在乃身而所以調燮劑量損益化裁使之各得其分以協相乎天地生物之心者亦猶服食鍼餌之於吾身必欲咸適於用而求底於安寧容自己哉吾

師一翁唐夫子力任斯道究心當世已數十餘  
年凡夫帝王經綸之畧王霸之辨以至昭代典  
章制度之詳莫不揚推訂証而其因革損益之  
宜補偏救弊之術又一一精思博采得其條貫  
舉而措之以曲成萬物而範圍天地若權衡之  
於輕重規矩之於方圓也非夫仁者一體之心  
其孰能與於此間以門人執疑問難發其端緒  
久而成帙因錄之曰政問是錄也探陰陽消息  
之原酌人心趨厭之實經世道升降之宜觀物

理會通之故究事勢利弊之極淵乎微矣王道之妙用備於斯矣

聖君賢相欲以興道致治此其龜鑑乎哉門人將授之梓以廣其惠於天下後世凡有志於用世者其必法天地好生之德體夫子濟世之心通其變而不膠乎故會其精而不泥于迹神而化之與民宜之以開萬世之太平庶不悖乎夫子之教若夫自私自利而一膜之外便爲胡越焉者觀於此其不赧然愧恍然悟而豁然自撤其

藩籬也耶

隆慶戊辰歲季冬臘日門生丁應詔頓首拜序

# 政問錄

問人臣從政秉忠勤者意本也若陳力就列事  
亦有體以爲執乎答曰爲治要識當代治體歷  
代治體各有所尚不審而宜之不能達秦尚申  
韓漢尚黃老唐尚管晏宋尚佛本朝尚朱文公  
學又問尚文公何如曰由中以應外制外以養  
中乃文公之學故愛民體國其精髓也據典循  
故其形骸也六部覆題必援頂前例無則具請  
旨奪不敢擅爲肇始以文議情見求明於古人

非所以遵王制也又問有學聖之心而生秦世則爲秦尚乎曰衛鞅持帝王之道不售輒自貶從秦此知尚而不重已甘龍杜摯則有已而不  
知尚士不羣生其時苟無轉移世道之力直須樂天獨善豈可昧於從事又問有已與獨善同異曰有已還落已見獨善從性天自然知尚知  
已知出知處

問學古入官經術所以經世務先王之法信不  
可遺耶答曰學古入官者師先王之意以立治

本若議事以制則從今之法今之法以時出之者也又問事不師古則所學何取於學曰學以開發其聰明堅凝其意趣端約其行誼持以事君而爲上爲德持以體國而爲下爲民先王之道與民宜之通其變使民不倦故法之所成先王之粗迹一時御世之用不可垂之於久遠今日所守只當有今代之法故述而不作所以守爲下之分信而好古明其意以行道孔子祖述憲章以此

問三代而下仕之途必有所成習雖一代之間其厯君厯年所習各異美惡盛衰之迹端衰好憎之情衆人之所同趨吾以一人入之力挽而勢不由於已詭隨而道不得於心則柰何答曰治朝衆所尚尚之末俗衆所尚避之又問春秋從同同柰何俯就曰從同同孔子之恕人也避之者君子之自立也又問自立嚴不幾於廢仕哉曰所以君子難進

問爲政首務答曰立信是首務孔子曰民信之

矣信是民立則是我漆雕開謂吾斯未能信斯  
指民言所以使之信是我立故立信須立望使  
上下疑已我無自立之素也

問牧道答曰天之立君以爲民君之分治以屬  
臣故惟牧爲切喻爲之牧則必求牧與芻求牧  
與芻而不得必平其梗而襄其成然又必會其  
通令不失其所爲之意蓋曰求則在我曲爲之  
處曰平則梗去而求即已曰襄則調而輔之必  
會其通則無所不宜也有不宜失其原牧之本

心矣秦皇漢武欲建萬世之業却將當下百姓窮其財力深有病於會通之間大都古今得天下者俱從救民苦疾上起家雖盜賊雄據之徒未嘗不由此小悟而借用之凡天人所助此以

問有天德便可語王道其要只在慎獨如何答曰王道有其名是虛位無豫定之迹只在天德上辨王不王故下一便字天在獨處見慎則德矣又問獨之景象則何如曰擾擾情欲類徇外爲人不有獨草草胡亂應酬乃昏昧不見獨矯

詐文飾則假借不是獨影響意興則助長不定  
獨只了潔自家則枯立不全獨獨對天地民物  
而言從一元至仁上發來統貫無遺纔能與萬  
物同體都收拾在這裏獨斯至矣此非慎不足  
以得之

問立法何以盡善無弊答曰凡欲立一法須廣  
照遠圖密察照不廣宜此不宜彼圖不遠利今  
不利後察不密得迹不得情世無不弊之法只  
以廣遠密分數爲善否多少古人舉動不草草

勾當却算盡這不徒作空意見直惟資故實融會事情

問後世治不如古其緊要分歧在何處答曰古今王霸惟一誠僞所判以大造生生同一善根同一聰慧豈古今人不相及只後世踈於反己故責人深圖治急却謂仁義道德不足以盡政理直湏濟以權謀術數所以用詐用計及上下相應輟轉欺紿衍化成俗間有知者出亦不爲世衆所容以能自立然其所以爲自立者又不

積誠圖感責脩挺挺如何得如古人又問誠僞之實曰誠是愛人真心僞者未嘗無仁義道德之迹但詳於法令假借以遂其私傳謂與居官言言忠信乃三代而下良劑

問爲政上下相感何道致之答曰滿宇宙同此氣生物以息相吹一呼吸便滿宇宙貫徹只因人私已勝遂令皮囊間隔惟其機甚幽甚微人不易識

問歷代廢興之由答曰自古創業之君身任革

道必明於救敝之實每朝末造所以衰微其初  
立國處已胚胎病根中葉賢哲識其勢而急反  
之纔國祚復衍三代封建貴賤梯秩故遞相爲  
逼萬取千千取百秦起知其故罷侯置守臣抑  
而民強耳餘勝廣及漢興漢興知其故兩致鈐  
握然天子豈無親信故宦官外戚終其世種一  
禍根自是東西晉南北朝以及楊隋窮變道昧  
制憲焚雜唐起知其故一意法紀却降本流末  
外驕內亂隱患術中蓋法以人存易人則反毒

勢然也其敝延五代不已宋起知其故首正君臣之分重內輕外由是外弱而夷狄起矣元治一統施爲亦甚宜但無公天下之仁非所以補宋德廣道化宜其運之不末也

問守令近民必求所欲與聚何作爲而可答曰守令責甚重原是以一方民命付之掌握今絕好是勤勞簿書潔已應務乃周旋自家名位總不屬於民瘼又十羊九牧趣見異同良意乖閣前輩一被命即從到任須知做起手逐一體行

又考合律例此職思其居又復職思其外除目  
下酬榦批發暇則豫思地方天災人變設有眚  
荒寇橫將何料理動支何錢糧調發何人馬遣  
差何才役又思末俗既成何道可能轉動還淳  
民業日窘何道可能漸次充給精神流行休戚  
一體是曰父母

問周禮五家爲比五比爲閭即秦法令民爲什  
伍何愛然不同效王安石保甲法即比閭之政  
何大不便於時管仲以內政寄兵似亦與秦事

同齊民何以願從答曰法以意行民須惠取周  
比相保間相受族相葬黨相救州相賓是欲助  
洽仁澤秦司連坐告姦是率尚以爲暴其造端  
命始已判然不蒙宋保甲本是聯民善術歲省  
百六七十萬之費而行之者懇誠不至致惹公  
私勞擾其內政稽攝之密嚴惠兩存故上下能  
喻亦成伯績凡長帥之道當與人共休戚協精  
神否則作相對勾當

問後世井田不可行可立均田法否答曰法以

時宜時以意運聖王馭世只欲以意周民之身  
與之利之三代而上天下非天子所有土田非  
百姓所有這乃是一副局段後世上有定尊便  
下有定業漢晉魏周之間亦嘗司均給籍唐太  
宗銳意於口分世業然成效難立沮勣易生周  
世宗均田只是均稅三代良法壞於商鞅租庸  
調壞於楊炎兩人者遭時戾古不脩意而脩法  
自以爲通變宜民且王莽李安世宇文融所處  
亦未周當許民賣買其還受只在露田鄉分寬

狹授列多寡不重出鄉之徙不立補助之省徒效法粗而運民之意衰矣又問限田法何如曰總只此意又問墾田度田方田令何至今可以嚴舉曰這檢查隱稅是幹辦上事非所以運於下者

問四方多故練兵急務而民貧乏費柰何答曰只古州兵爲最善有臂指唇齒之安無列屯坐食之慮國初垛集法以衛名翼正得此意正統宏治間設民壯亦相似近來却尚招募蓋因民

壯失原設本意兩廣打手起正德末年始以爲  
勝舉而今復成故事嘉靖壬子後南方有事率  
倣此以行然每無大便宜要之須有治人且古  
人練兵之始即思何術可以銷之纔有老相否  
則一不用便生亂其徵調甚非長策多遺地方  
之害又問天下原立衛所可復整頓否曰腹裏  
及脩倭已委無益之費只九邊差存

太祖天下既定兵令七分屯田

太宗靖難後大半着漕運雖智者透見銷法自後

不得銷中之練所以天下兵勢漸索上武人攻  
書藝下者墮統禪況差遣日繁廩供日尅帥長  
日靡又老家不處剩員不覈上下不相貫業無  
專肄而教失素脩民運爲養具者如故頽廈施  
支一木不可得也乃復重兵憲事招募增出一  
番兵費又無善演兩下虛耗

問漢唐而下國家有事四方或出遣宿衛曰不  
可或募長征健兒曰不可或發久戍之役曰不  
可或重支郡兵素養曰不可或招及奔命調及

惡少發及刑徒選及三百石吏曰不可以名地  
長技時一徵行費約而功倍何不可之有答曰  
狼苗悍桀永曾搜探金商絡石齊淄流星錘鐸  
狃鏢賴家旗桑植大喇毒弩真保力詔安陽山  
計犵狁毛胡盧都掌羿苗猥貉各有擅能只拘  
方之相緣俗之謀不辦通智又三官缺凝六欲  
時熾不免肆螫戕物况沿途婪眼所禁寔難以  
不教民戰非君子之心也

問三代前以農寄兵以郡國委積充兵既後世

可追其盛乎且有議練州兵立年例者是即此  
義否乎答曰要復古從劈頭做起誰則能之只  
州兵年例亦不得已調停法州兵即隋唐府兵  
又即鄉兵以其領之州云州蓋不養於官也然  
從戶徵撥無邱甸科條故併有年例之征近浙  
中立年例四十七萬兩其州兵終不肯行壬子  
起事庫積罄支癸丑用三十四萬甲寅五十餘  
萬乙卯七十五萬餘丙辰則幾二百萬矣至乙  
卯已括搜不漏乃思提編本省三十六七萬不

足則提編各省得四十萬餘至丙辰乃請京庫  
米麥馬草折銀一十八萬餘南京倉一十六萬  
餘徐州倉米秋鹽顏料六萬餘然四十七萬外  
巧名旁索與正額復相當但榜繫羈維豈特小  
補所念州兵一良務間俗偷安杞憂耿耿

問本朝兵制以親軍二十一衛衛禁官以五府  
四十二衛衛京城又以錦衣一衛假任權以制  
親軍而親軍以衆勢制錦衣合親軍錦衣與五  
府兵又適相當蓋彼此羈維之局自周官衛尉

中尉所主漢南北軍唐南北衙宋殿前侍衛司  
皆無異而錦衣之任獨與唐元從禁軍合其外  
郡邑之兵各隨地省要以爲繁簡疎密亦內外  
援應之局山東河南萬全大寧輪操不三輔而  
意存管營別設司馬不樞密而鈐攬有事由本  
兵請符定帥不開折衝府而勢張平時籍歸五  
府廩經本衛練劄營場隊無離土法甚得矣但  
無名虛耗而有演弗精柰何答曰射冒一節能  
無寒心直須女媧力可補此源

問楊炎兩稅法能革唐歷朝來積弊然不免人  
議而陸宣公亦甚不韙之如何答曰唐到德宗  
朝法已大壞炎之所處不可謂無因但只知革  
弊故脩法不脩意又其法之行所關係國脉者  
乃在量出爲入一言凡百役之費先度其數而  
賦於人其病根有不可勝言者什一天下之中  
正多則桀寡則桀天地間造化之妙消息理微  
流行感應適相當有這許來路便有這許去頭  
所以古聖王有量入爲出之制却准准不其相

遠若以所欲用費作倚傍奢儉豐約無所執以爲裁烏乎可其前代三十二十五稅一後亦每有弊釁蓋其不停閣應幹勾當即籍後裔驕情一有正歛民便不堪故什一是制用準的問堂堂萬乘什一之征何以足用孔子盍徹何以謂之徹也答曰能通之謂徹通之者均之也民有其十君用其一乃造化實理流行不滯之妙君民情相協是均事相安是均報相宜是均貴與賤均文與武均名與實均事與既均施與

答均有倚重非均有專奉非均有姑息非均有  
作無益傷苦節吝出納皆非均故爲政首務直  
須覈實今食者京營衛官軍十八萬八千能禦  
戰幾何內團營六萬餘即唱名未三之一外衛  
班操三萬八千餘能援敵幾何將軍勇力校尉  
二萬六千五百以充宮衛羨否匠作七千六百  
以布工指羨否廚役五千六百以供庖力羨否  
樂舞生一千三百五十以協音班羨否教坊四  
百七十淨身男孤老九百八十商其給養羨否

凡此歲支米三百餘萬石布五十六萬餘疋綿  
花二十八萬餘斤於此叅較裁量然後取與相  
常用無不足

問愛人心易舉而用難節故取民無制柰何答  
曰什一爲征正是爲仁政若在所用上理會便  
於人有滯碍山澤之利權不可下移鹽鐵本應  
收攬而管仲取於無形這一念差了桑宏羊劉  
晏爲國陰籠潛制却不在君民兩下槩觀然二  
人事幾老練能照顧種種不漏安石法古慕義

却踈腐多債事到蔡京薛向吳居厚復潤安石之珠又落一層若唐率貸法并僦匱納質間架除陌錢宋月椿板帳經總制錢俱是攔路白搶故葉適謂王安石之法桑劉所不道蔡京之法安石所不道經制等錢雖吳蔡所不道及其急迫皇駭名公如趙鼎張浚皆安焉遺後而秦檜權伎刼脅一世此名言也切以爲管仲牟筴尚在清截上運料只還有民在心於桑劉又管仲所不道若比較冉有陪粟另復一樣機軸漢武

一得馬息遂除告緡文帝入募粟塞下遂減田  
和這心術路數亦不在管仲下所以節用愛人  
四字一串用

問藩府供例不充柰何答曰嘉靖末年郡王二  
百四十餘位將軍中尉一萬二千餘位郡縣主  
君一萬六千六百餘位歲支祿米八百六十餘  
萬石如山西存留米止一百五十二萬而祿米  
三百一十二萬河南存留止八十四萬餘而祿  
米一百九十二萬何以克濟

太祖初藩封祿米五萬不久改爲一萬郡王初封二千襲封一千成化十一年例初襲封俱一千嘉靖四十三年例悉照成化間例其三七本折兼支將軍三七中尉四六郡縣主君二八本折庶人同妻月給六石中半庶女不給凡房屋冠服墳價俱革免此亦太省但以大道爲公須各令自申賢爲世用次亦食力更可復省國費中間差令有別以盡親親之仁又不失成全之德屢見有建白者宋事亦可考

問小臣常祿不給用則如何答曰國家制祿今之居官多費如何足得若能立得脚跟定量入爲出何不足之有近見賢哲亦巧作處置顧公佐賣放皂隸

**宣宗**以問楊公士奇對以常祿不足臣亦有此事剛正如顧仁明如楊皆以爲可行以可爲見者也故不憚私改公法苟知真有可改持法之顧可以請改得君之楊可以議成如馬公文昇奏徵馬夫銀可也否則率身自約而已大都後世

賢哲類自用白專國初禮儀定式書行於朝廷之上者至今不廢其官員行於私室者成化後以漸改動行於公堂者亦廢遷於嘉靖間洪武禮制書進賀出使祭祀階勲祿俸不擅易若行移服色等每至更變稽古定制書限制品官各有秩守中間奪意奪形日銷日飾蓋始端倪毫忽涓涓江河不可不慎也羅先生倫曾以東里之說欠精不爲無見

問漕事曰弊軍民競奸公私罹憲正額掛籌無

筭而本色濫惡議者欲改法若何而可答曰天  
時人事交相感病源不在無董者亦不專在軍  
專在民今雖有漢番系桑宏羊唐劉晏韓滉宋  
范置政權事體便難轉手法有合因弊生積勞  
永樂十三年罷海運行四倉轉運法宣德間周  
文襄議變允運成化七年滕都憲議變長運成  
化十年又議有改允長運即宋直達法轉運允  
運改允即宋轉般法宋善轉般病直達以今例  
則反之然使今行轉般尤不可况額斛代發之

盛安望如宋今之冗耗加四又三六折銀釐米行糧安家糧賞勞銀處已厚矣而奸者益逞凡冗必爭爭必傷命以命博米蓋有相依以爲命者必追見病源體其所難爲事可不更細問出禮入刑大明律可合天理之節文否答曰本朝兩本古文一狀元策一大明律這是堯舜禹湯文武相傳心法所以當天理愜人情者近日却被仕途漸漸壞了庚戌年兩者又一番變動又問書是粗迹何係重輕曰語從意易又問

大明令曰令示人趨禮之路治定功成乃作律  
詳於出禮之禁歲代既久復有諸例條以補律  
之不脩此須題請 旨奪近日却擅開叅照之  
門公然不與律合前輩有碍手處寧稽閣作老  
未完安肯含糊律意

問炎海管仲霸業何以後世相沿不已答曰取  
於無形便是管仲私舉今日塩筴不歸於官豪  
強得競利民亂必起如何住得如沂州等諸礦  
場官府不作理會爭奪必煩漢中茶園勾當因

其私販而止之若民間晏然樂業生出事端非  
蕩蕩平平之政楊遂菴事幾熟令招商自買一  
時民悅利反倍集宋熙豐權蜀茶置賣鹽之場  
罷通商法即非不得已細玩之自得賈似道置  
六郡公田三百五十餘萬全失大體凡處利局  
多迷不與民大道爲公所以上下相給交征夾  
構能此處透靈即是王心王政

問國用不足正德來已然但嘉靖壬子後民業  
蕭颯何如答曰天下歲徵糧三千六百三十餘

萬石漕費白糧南糧祿俸餉邊等各有頭項內  
京運三百七十萬正德間京師月支三十四萬  
每侵用太倉原積嘉靖紀元詔革月止支十八  
萬二十年後月支二十五萬四千餘京通倉宏  
治前十年之積嘉靖十年前尚有六年餘積二  
十年後不穀四年之數歲入銀糧折八十餘萬  
兩及戶口商稅塩課船料草折閘辦等共二百  
四十三萬餘而官軍折俸諸邊年例內府成造  
聲息奏討賞賜節誕親宗各費約二百餘萬嘉

靖八年前內庫積四百餘萬外庫積一百餘萬  
二十年後止存內庫一百一十餘萬外庫三十  
餘萬二十九年一深入通州請脩兵銀八十  
萬薊州請脩邊三十七萬大同請增防秋四十  
餘萬宣府請增防秋四十餘萬京師咸寧經畧  
費出多名昌平懷柔順義白羊口潮河川紫荆  
關各加厚治增定賞格自是歲增各邊募兵銀  
五十九萬三千擺邊設伏客兵銀一百一十餘  
萬又加鹽銀二十四萬六千京營加免放馬料

一十八萬內府加鋪料數千共歲支太倉三百  
四十七萬扣歲入尚欠一百四十餘萬却以開  
納括取濟用添設天下巡撫數員兵備數員員  
下所用無筭河南山東創練各六千山西陝西  
倍戍而南倭適猛東南繕城百萬計遠調募勇  
百萬計哨海百萬計其被標  
萬萬不能計  
也時出奇告能提編巧取括權無漏軍門揮金  
技夫競刺加以元察婪縱宮奄風求宦林自立  
之難又廣有張連福有胡平江有三巢川有王

章大回有邱富河南有師尚照貴州有揚河民  
告困矣

**祖**宗功德深厚窮變合通須制奢裁冗元氣可復  
又問事既久定可裁而制乎曰以鄙戇妄測今  
日之費可十去五六

問兩京之制古乎答曰古無是也自三代來皆  
有兩都會只存得虛名以爲應脩蓋不張官置  
吏及養兵以峙立重繁多費

**太**祖都金陵以汴梁持一虛名爲北京

太宗初營北平連年多事規制未暇悉定隨往衙門加行在二字觀二字未除可以知其缺典也

齊志以崩而臣下復無見者遂因循以成轍

問水利小故何古今利害不齊禹之行水人所共知何賢哲之不能悟答曰禹原從此心蕩蕩平平做去後世却將一意見便直前不肯深作商量陸海鉗盧陂龍首渠都是一事中得太虛之體魏起鄭白皆詳審觀會致收大利翟子威杜元凱乃以決堤塘爲利元凱於學成癖及當

事幾却精酌其論水利謂人心所見不同利害之情且異此理之未盡而事多未妥這是他作要用要訣江東永豐圩明越湖田將廢地成良疇然卒遺民害不惟秦檜蔡京昏溺雖韓世忠亦不之察又王安石信人說欲決汴廢塘濬以濟耕而國家設險通食并弗之顧及欲涸梁山泊成田皆草率喜事一聞劉貢父善喻便能動心要之處事無大小必從學問上研磨乃得問屯田獨盛於古云何答曰兵法明可以言屯

趙充國馬援王霸羊祜所以成功曹操知兵遂  
有素紙任峻收許下之績唐行府兵法不屯而  
屯宋使牽強襄州唐州有行不就陳恕何承矩  
何等畏難蓋農怯於爲兵兵耻於爲農釋戟趨  
耕驅農轉戰必先得一關楨這是兵家緊要處  
祇可以心會大段兵之至只一箇諸無漏三官  
不亂五教響應專爲恁麼子路路皆通故曰關  
楨且屯田又是銷兵妙窟烏可少得留都江北  
之屯歲獲十三四萬然其人已全是農夫甘涼

四郡之屯其人亦棄非戰雄矣國初制屯租畝  
取一斗導耕之意甚勤但於兵事不相貫只好  
充營田之務又問營田云何曰營田是給養開  
荒一直絡民事

問空文取士得人爲難專重薦舉私於阿徇柰  
何答曰三代而下校士脫不得試言一路其原  
立科場式例亦儘能觀考但恐無具眼 本朝  
特重制科莫若三途鼎用以薦舉易歲貢士行  
誼素著充薦額有不稱敗官嚴罪舉主庶免阿

狗然非養於未用之先縱得士亦士之自立不足  
足以係風俗

問督學校士以文何以使士必敦行答曰士之  
肯自重其機全在有司提調宣德間纔有督學  
之設蓋恐提調徇私故按察設官以稽覈之今  
若所校專在文安得使士重於行誼必欲舍文  
則科目所取何物况校行甚難以行為賞罰則  
必有僞以應之將寄耳目於人則必有徇以私  
之以一人周知省之見聞焉能易於得實且正

文體是時論縱正得來也無用又熟訪察是時  
論縱無行得非大體或惹生事端又抑奔競是  
時論抑固可以造面徒鼓奸桀之氣心未能易  
也要之三皆未盡移風之道只須慎選主督久  
其年任使得端已平氣着實自脩自克懇行於  
三者之中必轉動其精神稍得幾人實相法效  
方能漸次流廣今日大病痛惟在私意橫馳能  
我無私焉人心之靈造化之妙必有感而通之  
者

問私鹽盛販奚法以禁之答曰禁私販只本朝之法甚平正前代法太重却在事上鈐軋求勝不廣照大體漢私鬻鈇左趾唐鬻一石以上死州縣團保相察私鹽月再犯易縣令罰刺史俸宋因五代貿易至十斤煮者至三斤即坐死本朝律例却的當情罪私販止杖一百徒三年蓋市利本齊民細愆可以矜宥又止理見獲人鹽不許展轉攀指所不窮追謂其懼而脫也肩挑背負勿論謂其力止一身也而挾勢逞兇因而

悉後則重其罰以彌之故軍捕罪斬張旗設仗  
殺傷人梟首重拒敵也運糧帶軍器同私鹽法  
監臨權勢買引同私鹽法若權勢私販邊衛充  
軍巡捕官與販充軍重假勢也越境二千斤上  
充軍重越境也凡此制辟不在鹽乃出鹽之外  
因事以抑其漸此律例意也且靈州產味美於  
河東江北味美於江南筠吉路便於廣產南汝  
路便於河東浙東山商川中資食未康軍并青  
白鹽河階狄道魚河可充隣境之用這湏因人

情有處豈可強爲禁禦

問鹽同都轉運秩重舊與藩臬抗衡後乃隸二司以利牟之所轄且因權勢撓刺復差風憲足矣其出侍郎遣都御史不已複哉答曰設官無謂類此此正統後例也理鹽有大政後世絕好舉動如孔僅牟盆張林官鬻姜師度置屯第五琦車牛戶劉晏額外錢皇甫鐸加估王隨行商蔡京請鈔及輸芻粟悉下入帛入錢粟京師交引法對貼鹽對

板允支改配掣摯法閩廣權法元中統漸增價  
法可謂極筭然只好謂之末政何也爲國聚歛  
之臣耳中間有曲盡通商之處多區惠寵之方  
爲之祛其梗節其費省其繁體其瘼賑其乏時  
其期清其侵可謂能逮下然只好謂之中政何  
也通之以爲國輸惠之以爲國營非專以宜民  
也王者之平廣衡山澤之利而掌之官所以弭  
民之爭市者實道不得不招商商願出於其途  
其利之也國可陰寵而悉以筭乎寵者民業

不得不任人民願業於其野食其力也以例農  
則止應什一之征也此之謂大政王者藏富於  
民國家十分得其一又庇其損害民安得不富  
衛觀監賣即能復流民隋與百姓共山澤一事  
中得古意若幹辦從這心來纔於利場上不迷  
其本

問洪武間教民榜文一書迄今可行否答曰此  
乃洪武二十一年頒行

高皇帝武功旣成文治熟諳到此時直見得安養

元氣一大孔竅却該在這裏運用惟是舍這裏  
所以有紛紛多事

取謨溫益情意敦懇古雍熙太和之盛只是這些  
子處蓋里正有長人之責鄉亭有三老之尊今  
那克勾攝承引帖而已此處不轉得一轉非洙  
泗講究

問華夷勝負信在邈威盛衰俺答辛愛阿小孩  
黃台吉打來孫把都兒土蠻虎喇哈赤台能甚  
熾又考撒脫兒小一千元慎擺腰王打賴等部

小種尚悍必深圖震遏可令遠懾答曰此言以  
力勝衆人所知但造化感通之機幽微報施之  
故尚當包括度內近題奏舉動每惟相對王者  
無不愛禽獸草木一氣獨於夷狄哉漢武窮搜  
張湯傅介子馮奉世任一使致夷王之首班超  
三十六人開西域實憲數十騎空朔庭已而諸  
羌交亂中州晉胡拓拔據中原三百年金滅遼  
元滅金皆宋之爲計未幾而爲所乘人心之天  
仁則和和則順否必反之故保四海乃至德力

勝是第二義本朝掃除腥羶之論宋潛溪作起  
兵檄意發極詔

太祖所自爲只說元德衰運終此

太祖萬物一體之見

問靖難死節諸臣可謂純臣乎答曰忠烈不撓  
死乎砥柱能超與世沉浮之俗但可重非其所  
至可敬非其所法前輩有謂殺身之義不能贖  
亡國之罪人臣貴盡於常職事當力諍法在豫  
圖其不用則有去而已坐以待償想亦模糊縻

祿未盡業脩雖不可律以徒人費石之紛如若  
自全其性之謂純則有說矣其間諸公不磨耿  
耿能普照瀝虔者不少又不可槩論

問馬政善於唐而弊於宋論者以官養爲便今  
之養歸官而牧事未昌何歟答曰唐有王毛仲  
張萬歲故官得其養宋之保馬法使王安石以  
官行之亦未必無弊有治人信然爾今求牧與  
芻權要奸頑多有侵格當官舉職競綽懦魃每  
偏縱刻故役丁地畝椿朋私用科駒漸出弊欺

又調餽不恩公傷妄報給用不視為已物定駒  
顯駒重駒不時其驗考則又不若自用自養能  
為自愛

問律設大法禮順人情是貶律以從貸乎答曰  
非也順人情乃體貼律意律列諸條任其人擇  
而配之故惟明克允可以明罰勅法蓋聖人之  
用刑乃好生之德所運明者昭其生生之術允  
者篤其生生之恩所以臯陶意顓頊教後世豈  
惟無是心并亦無是術易大象六卦說刑其五

就明威上迷意義其中予議獄緩死非尚姑息  
爲優柔不斷蓋指原來這一點字產刑書李悝  
法經漢魏九章十八篇至唐刑統可謂精脩復  
益之以張戣張湜竇儀諸人搜擬詳論然總於  
術上研磨於對鞫申讞處未見好生一念真做  
骨子間有知者又將貶律從貸誤認是此物後  
世分仁義刑德作兩平忘却乾元本始故用刑  
而刑誤

問將門家丁可蓄否答曰須觀時以爲廢置蓄

時有養具停遣有着落處則蓄之梁震乃嘉將  
銳丁蓄六百餘及被論閑住無別門可收各投  
用虜庭今日內外交通都由此輩趙小崖王三  
鄧富皆有所由來後周尚文張達李津借此覘  
虜虛實雖每克成功而邊務大壞之矣夫華夷  
中外界辨須嚴虛實既通未有不基重患商倭  
盛於嘉靖壬子亦由舊時寇而寇商而商商阻  
不通則入寇借援寇有憑依則因商醞釀嚮導  
端倪良善瀾倒率無所於救藥宋素卿宗設許

棟李光頭陳東辛五郎蕭顯陳思泰徐碧溪總  
是我民

問仕有無舊章而承近守從之可乎答曰所係  
大則不可如薊遼撫賞分明是買和當其事則  
必思所以爲之處又問撫賞云何曰撫賞始行  
於嘉峯口後無處不行始行之有時後不拘時  
而行始只川塩米後加牲帛又筵席每一行軍  
入科銀二三錢各口歲費一萬四千餘兩遼東  
取馬市課稅抽分二十七年形諸疏請且覆狀

不察當否視若例之所有此樣舉動太易前輩所不肯爲如府江制給以待居平困醜且令佐守爲有名之與榮黎階又滇貴每有買路錢亦旅夫自爲猶之可也而近日下歷高沙岑江之給恐未云是薊昌鎮事近處置儘極嚴密添設標兵五枝枝三千名援調七鎮兵各三千名總兵移防石匣營當審雲古比口石塘墻子嶺之衝節制獨石探白草川三門房之哨增築墩堡重縣賞格事周於前例兵倍於宿威不趁此時

革撫賞更何待耶

問救荒答曰只是一箇預備以三十年之通民無菜色又遺人之委積以待凶荒到得行救時便無極善之法周官十有二政聚萬民皆非常物之外添得出所謂救荒有三法賑糶賑濟賑貸賑糶屬常平賑濟屬義倉賑貸屬截留常平倉自李愷耿壽昌平糴法桑弘羊平準法福建社倉法隋文帝唐太宗亦力行之及文彥博曾鞏田錫張誨黃寔王孝先又一時權設糶法義

倉是民間拾粟儲濟截留如蘇軾截留上供米  
宋孝宗令截留本州椿管及借會子收糴賑糴  
此外晉秦乞糴唐憲和糴范純仁招糴劉安世  
刪常平向經倡賑滕達道活流民畢仲游限賑  
地劉彝收棄子趙抃洪皓趙令良咸苦心殫力  
并木酪是正種燕菁種豈鬻爵度僧興傭鑄幣  
總是一時小經畫非王猷嚶嚶大體國初民間  
有倚能禦大災到成化弘治間尚不乖誤周文  
襄處置詳切其濟農倉緩急有賴弘治三年班

議預脩倉糧計州縣里分積糧多寡自十里積一萬五千石至八百里積一十九萬石官以積數爲旌擢宏治十年通行撫按稽治曠職以嚴申罰只正德來漸不加意又復以守支爲民病且國無儲羨截留自難而民俗蕭條義倉無所堪矣

問捕盜何法可速鈎獲答曰捕盜之職如藥味中大黃大黃不煉過不可用若以必得盜爲心便非神武而不殺此須煉以洗心正德間差三

御史出捕殊非事體遂惹起大患往往見大盜  
都從有激而起能殲豕之牙當其邪念初萌却  
誘掖匡救容易處銷磨不爾亦殲厥渠魁此外  
借威行恩一以保全爲主再不爾雖不貸誅戮  
必小其名色定讞聲罪庶不連及無辜傷造化  
至和

問蠲逋代輸所以恤窮王政有諸答曰宋乾道  
淳熙間諸賢守令嘗爲之然中間各有不同或  
不得已而充供應或急拯極下戶疾苦或恤其

流離而還集之若槩無所分輒與存庇不啓奸  
則誨惰王者不爲也又問省耕之補省歛之助  
非王政耶曰二致省自不浪然而及又問不數  
赦卽此意否曰然

問近日勤王外援之議盡乎答曰兵不可無制  
制定於先乃無後失古兵法妄動雖成功亦罪  
之唐因九節度之後無命突赴以爲竒能漢宋  
之問董曹長驅而入亦每有此春秋人得而誅  
之之說若不奉王命終是春秋時舉動必須先

定某地援某地某地赴某地俟命法守不踰矯  
借毋雜然後可

問天下均一民也何設州設縣之異答曰凡設  
州之處必是地方緊要故重其衝以鎮之今知  
州官不比知縣得行取入選反縣重而州爲輕  
此必有以處之以復低昂原意乃得

問薦士行不養於未用盡屬之考課此仕所以  
得真士之寡也將何如答曰誠然但既屬之考  
課不必更立他法即從考課上實行之如取人

必斷其大體大節其氣質之偏形迹之疵又須  
裁議這是公論所在大段難掩只當事者愛憎  
入心便假借論評是非不白但末路論人只貨  
財一類是立身骨子此處欠檢點隨其才美皆  
可一筆勾倒又酷慘害人亦是大惡然總自貪  
上來

問武官選法之難能無累耶答曰貼黃一節不  
可不慎法立正黃又立小黃藏之秘府三年一  
清理得矣但查黃不虔歸黃致紊續黃苟率遂

使原黃無憑老黃堆湧或以調改失祖黃或以  
虛應行揭黃或據堂稿選簿准替廢對黃或乘  
奸賄爲盜黃或欲捐駟報無黃蓋君子之澤五  
世而斬理所宜有霍元崖清黃議似繁澁若從  
簡當須平時會查的確復設副簿題其綱要亦  
藏秘府稽維又舊設五櫃混貯不便檢閱當更  
之以厨增黃允維當疊粘有法度一檢而得  
問武臣厲行之難如何答曰只一立功欠處所  
以欲其顧惜不能也

問居官省接與恐見聞寡不能達下情若泛泛  
則惹事端而亂耳目如之何答曰接與不得有  
意多寡當順其自來但必正己允風論履況所  
者以爲好惡者須慎其趣尚混然無見其有先  
入又不可多屏人密叩令凡所與蕩蕩無涯此  
是自家養德功夫不因官有也

問言責答曰人臣進言真從學問上起惴赤纔  
有爲國爲民之實後世絕好是慷慨激烈只了  
得自家門面程子可啞御史其意味在辭義之

表不是浪說御史豈可啞得

問入朝便忌榮辱之相形也何以爲弭忌之方  
答曰貴爲衆所忌以其競取之也富爲衆所怨  
以其積取之也君子量入以爲天下用所以終  
不能富是以免怨不競於取貴而猶以得之必  
其與之者順其所來則衆亦與之同心是以君  
子必能貴於治世然而終不得則亦無損其爲  
君子也故曰君子欲之君子樂之所性不難  
問作事制用之法答曰凡制用計其常筭外還

寬一二分令其可裕於行其所寬處隨其難易  
以爲多寡只不可以喜怒爲登耗凡遣人行路  
及程功衡目皆須此法

問檢驗尸傷有無冤洗冤諸錄所載及隨時隨  
地省輩諸弊固在神而明之但中間亦有可言  
者否答曰調之檢驗須先鞠審而得其情猶以  
口辭難信乃復檢之試其合否有不待審即登  
場非也况凡死者血氣將盡其體骨多致傷迹  
烏得據以爲信

問成大事不計小費又謂行一不義殺一不辜  
得天下不爲二者孰從而合答曰甲事甲費乙  
事乙費故成於不計費甲成乙費乙成甲是謂  
無辜乃名不義况恣我意見遂我私欲我咎深  
矣

問於官而臨親故何如答曰吳憲待崇安宰以  
上世與之有契不以法相繩晦菴非之曰漢武  
帝不以隆慮公主之故赦其子昭平君謂法令  
先帝所造柰何以弟故廢之何面目入高廟東

方朔上壽曰不偏不黨王道蕩蕩竊意東方朔得立法本意若謂法令先帝所造也是第二段話晦菴又謂爲稅官若父兄宗族舟船過須委官檢稅竊意這瑣碎也不須如此只要公心處之不令草草放過

問居官請托至何以處之答曰固非曲從亦不可加忿當善爲辭懇張公道開說事情必盡吾誠意令彼內慚而退

問有司主出納若何答曰出納有司之常須公

以計之又須立箇文案又問事在煩瑣或不係公行者如何紀存得許多曰所籍可以爲考是衆見是簿書烏可草草

問仕以勢爲用分定而禮嚴有不率焉何以遇之答曰須正之然正是行禮不是復勢惟辦誠心乃可辨又問有用勢橫而臨之何以爲承曰只以誠心相感我不緣之以動又問突乎其來從其亂命否曰勢固不可競而爲抗必欲其趨其趨只怕利害毀譽心衆其中若欲避迹因而

特著避情便爲造物所忌咎自天降

問君德以剛爲主但決裂重便粗疎柰何答曰  
事要斷制撇脫亦要詳審從容兩者皆第二義  
却有源頭是在能明詳審從容以定明不令有  
昧斷制撇脫以遂明不令復惑其兩源又有淵  
奧直須在凝神未有神不凝而能明者